



*Sabtu, 26 November 2022*

**Ogen: Matius 25:19**



**Erperkiran**



**N**darami sen seh serana, engkerikenca seh menukahna. Ranan enda mekatep terbelas bas kita. Uang keluar reh buena, keperluan jabu, anak sekolah, ndahi tenah kerja, adangen-adangen bas persadan bage pe bas gereja. Kentisik nari bengket ka me kita ku bulan Desember, la sitik i je iperluken duit, lit deba ngelitken seragam bas PJJ, kategorial ras sidebanna. Itambahi ka alu tas baru, sepatu baru, langge-lange mbaru, asesoris si mbaru ras sidebanna. Kerina enda ngajuk kita guna ngelitkensa segelah baci ipake. La sitik si terlana, piahna iusahaken segelah lit arah erbage cara. Iidah barang baru entah pangan (jajanan) si mbaru/tren minter mesikel ndatkenca. Kredit pe ibuat me, kredit i jenda, kredit i jah. Lanai siukurken asakai uang masuk sabap i bas ukur e adi sitik-sitik banci nge kari igalari. Belanja jah, belanja jenda. Bagenda me kinata si mbue terjadi bas geluh, piahna bagi kata pepatah nina "lebih besar pasak dari pada tiang."

Wari enda iperingeti "hari tanpa belanja Nasional" pengarapen segelah kita banci erpekiran bas geluh. Sada wari enda pengadi lebe sura-sura belanja janah rukur erbahan pangan man jabu, entah erbahan barang bekas jadi erguna ras sidebanna. Sekalak tuan mulih bas kuta sindauh nari erkira ras juak-juakna sabap ndube enggo iberekenna duit man bana segelah banci ipakeken, ernanam dengen erbuena. Bage ka pe kita selaku bendahara tengah jabu niarapkan erpekiran bas geluh, rukur alu pentar makeken si lit e labo engkerikenca. Ukurken lebe sope itukur, enggo nge e sada kebutuhen entah terjeng jile-jile saja, kenca si e nehen kengasupenta i bas ngelitkenca.